



KPM tekad laksana seruan Agong berhubung bidang pendidikan negara

Februari 14, 2023 @ 11:00pm

KUALA LUMPUR: Kementerian Pendidikan (KPM) bertekad memastikan seruan Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah berhubung beberapa perkara melibatkan bidang pendidikan dilaksana demi kebaikan dan kesejahteraan rakyat.

KPM dalam kenyataan hari ini, memaklumkan langkah itu termasuk memastikan ia menerajui Dasar Pendidikan Digital (DPD) bagi menyambut agenda pendidikan digital negara seiring dengan keperluan kini dan masa hadapan pendidikan.

"KPM juga komited untuk memastikan prasarana dan infrastruktur institusi pendidikan di bawah KPM sentiasa berada dalam keadaan selamat dan kondusif melalui projek menaik taraf atau penggantian blok bangunan sekolah daif.

"Dalam bidang Pendidikan dan Latihan Teknikal Vokasional (TVET), ia akan terus diperkasa untuk melahirkan graduan TVET yang memenuhi keperluan industri dan negara menerusi pendekatan usaha sama pihak awam dan swasta," menurut kenyataan itu.

KPM berkata, dalam meningkatkan lagi tahap keselamatan dan kesejahteraan murid di sekolah, KPM juga memperkasakan penggunaan Modul Intervensi Jenayah Seksual Kanak-kanak di Sekolah (IHSA).

Selain itu, membuat penelitian dan semakan berkaitan peraturan disiplin murid yang lebih komprehensif.

Semalam, sempena Istiadat Pembukaan Penggal Kedua Parlimen ke-15 di Dewan Rakyat, Seri Paduka menyentuh beberapa perkara melibatkan pendidikan.

Antaranya, dasar pendidikan digital merangkumi penyediaan infrastruktur dan keupayaan digital sedang dirangka bagi merealisasikan agenda pendidikan digital negara dan menjamin akses kepada pendidikan.

Al-Sultan Abdullah turut menyokong usaha agar TVET terus diperkasa termasuklah mengadakan usaha sama di antara pihak awam dan swasta dengan pihak industri menerajui pengoperasian institusi TVET awam.

Langkah itu bagi memastikan graduan institusi terbabit dilatih berdasarkan keperluan semasa industri setempat. – BERNAMA